

նայում հայ-կաթուղիկէի եւ հայ-բողոքականի վրայ, ինչպէս եւ վերջիններս առաջնի եւ միմեանց վրայ:

Բայց ո՞վ է Ղարադաղցին եւ Ղարաբաղցին. ո՞վ է հայ-լուսաւորչականը եւ հայ-կաթուղիկեայն, հայ-բողոքականը. մի՞թէ ամէնքն եւս մի եւ նոյն ցեղից չե՞ն, մի եւ նոյն ազգի զաւակներ չե՞ն. մի՞թէ ամէնքն եւս իրանց քրիստոնէութիւնը չընդունեցին՞ Գրիգոր Լուսաւորչուց. մի՞թէ ամէնքն եւս մի եւ նոյն լեզուով չե՞ն խօսում. մի՞թէ նրանք մի եւ նոյն պատմութիւնը չունին՞:

Անշուշտ, այդպիսի մի խորթութիւն, այդպիսի մի փաստակար բաժանում տեղի է ունենում միշտ անկիրթ ժողովուրդների մէջ: Եթէ մի հասարակութիւն կամ ժողովուրդ անհատական կեանք է վարում, եթէ նա չէ հետաքրքրւում միւս հասարակութիւնների կեանքով, եթէ նա իր ոյժը, բարօրութիւնն ընկերական կեանքի մէջ չէ տեսնում, կը նշանակէ թէ նա դեռ լուսաւորութեան ստոր աստիճանի վրայ է կանգնած: Հայերի մէջ չկայ բարոյական միութիւն, բարոյական համերաշխութիւն, որը միակ դրաւականն է ազգի զարգացման. հետեւաբար, մի տեղի Հայի ստացած անարգանքն եւ անպատուութիւնը՝ միւս տեղի Հային չէ դիպչում, չէ վշտացնում, այդ կողմից մենք Հրեաներից անգամ յետ ենք մնացել: Մի քանի տարի առաջ Գութայիսում մի Հրեայ ամբաստանուեց, թէ նա իբր թէ արիւնաքամ է արեւ մի քրիստոնեայ